

11 DEC 1996

Ghazali-Asean

TIDAK ADA SEBAB MENGHALANG MYANMAR MENYERTAI ASEAN TAHUN DEPAN, KATA GHAZALI

KUALA LUMPUR, 11 Dis (Bernama) -- Bekas Menteri Luar Tan Sri Ghazali Shafie, yang memainkan peranan penting dalam penubuhan Asean, berkata beliau tidak nampak sebab mengapa Myanmar tidak boleh menyertai perkumpulan serantau itu tahun depan.

"Ya, mengapa tidak," katanya apabila ditanya sama ada Asean akan menerima Myanmar bersama dengan Laos dan Kemboja tahun depan dan sekali gus mencapai aspirasi untuk merangkumi ke semua 10 negara Asias Tenggara ke dalam persatuan itu.

Dalam satu temuramah dengan Bernama, Ghazali berkata ia akan menjadi satu mimpi yang menjadi kenyataan sekiranya semua negara-negara itu bersatu di bawah naungan Asean.

Pada penubuhannya, Asean yang akan menyambut ulang tahun ke-30 tahun depan, kata beliau, tidak menetapkan tarikh apabila ke semua 10 negara akan akhirnya menjadi anggotanya.

"Apabila mereka telah bersedia, mereka boleh menyertainya...oleh itu menjelang tahun depan impian itu akan menjadi kenyataan," kata Ghazali yang sekarang berusia 74 tahun dan masih aktif mewakili kerajaan Malaysia dalam hal ehwal antarabangsa.

Satu laporan dari Tokyo hari ini memetik Perdana Menteri Datuk Seri Dr Mahathir Mohamad sebagai berkata bahawa Asean "berkemungkinan besar" menerima Myanmar, Laos dan Cambodia sebagai anggotanya tahun depan.

"Ia berkemungkinan besar terjadi tahun depan," kata Dr Mahathir dalam satu temuramah dengan akhbar Yomiuri Shimbun dan akhbar berbahasa Inggeris Yomiuri Daily yang disiarkan hari ini. Beliau telah ditanya bila Asean akan diperbesarkan untuk memasukkan tiga negara ini.

Malaysia akan menjadi tuan rumah kepada sambutan ulang tahun Asean yang sekarang dianggotainya bersama dengan Brunei, Indonesia, Filipina, Singapura, Thailand dan Vietnam.

Para pemimpin Asean telah bersetuju di sidang kemuncak tidak formal mereka di Jakarta baru-baru ini untuk memperluaskan keanggotaan kepada ketiga-tiga negara itu serentak tetapi tidak menetapkan tarikhnya.

Ghazali menolak gesaan barat supaya Myanmar dihalang sambil berkata ia bukanlah satu cara untuk membawa perubahan.

"Cara untuk mengubah orang ialah dengan mendekati mereka, bukan mengasingkan mereka," kata beliau yang menjadi pengerusi suruhanjaya yang ditubuhkan pada tahun 1990 untuk mengkaji dan membuat cadangan memperkukuhkan mekanisme Asean.

Beliau juga telah dilantik sebagai wakil khas untuk memerhati pilihan raya di Bosnia Herzegovina September tahun ini dan mengetuai pasukan pemerhati Komanwel di pilihan raya Bangladesh dan Afrika Selatan -- Bernama

AZZ WAT